



TEZAU LITURGIC

31 IULIE

**SLUJBA
SF. IERARH-MUCENIC
VENIAMIN
KAZANSKI,
MITROPOLITUL
ST. PETERSBURGULUI
II**



MOSCOVA, 2000



Служба священномученику Вениамину митрополиту Петроградскому и Гдовскому, и иже с ним пострадавшим

На Господи, воззвах, **стихиры предпразднству
на 3 и святым на 5, глас 4:**

Издетска чтению словес Божиих прилежал еси, /
неленостно поучаяся в законе Господнем, /
чистою любовью к Богу прилепился еси, /
священномучениче Вениамине, / мучеников
подвига желанием уязвился еси, / святителю
славный Церкви нашея. / Егда же приведе тя
Христос ко жребию оному, / ничтоже убоялся
еси, / обаче благодарне рекл еси: / слава Тебе,
Богу нашему, во веки веков.

Избранный народом Божиим на кафедру
святителей Петербуржских, / никогдаже покоя
телесного имел еси, / но во вся пределы града
столяного стопы своя направляя еси, / не
гнушаяся едином чадом Церкви Божия, /
собирая воедино паству твою духом смирения и
милосердия, / священномучениче Вениамине,
отче наш, / не забуди и нас, но кротостию своею
посети души наша.

Яко мать о чадах своих болезнующая, / тако
жилища убогих и незнатных посещал еси, /
совершая людем неимущим / службы яже ко
спасению потребная, / избегая почестей
мирских и славы века сего непостоянныя, /
предстоятелю Церкви Петербургския, / образе
благочестия и кротости, / просветивый
напоследок времен люди твоя / присносущным
светом евангельским.

Стезю самоотречения и любви / в жизни
земней шествовал еси / и достигл еси
Иерусалима вышняго, / божественным светом
осияваем, / обаче и дольняго града своего славы
не лишил еси, / облагоухал еси фимиамом
Православия берега Невския / житием своим
чудным уяснил еси нетленную красоту
заповедей Господних.

Благородство души твоея Христос Бог провидев,
/ саном архиерейским возвеличи тя, / расширяя
стадо и умножая труды твоя. / Ты же,
священноначальниче Вениамине, / на высоте
сей духом смирен и неизменен пребыл еси, /
заботы о людей угнетаемых не оставляя. / И
ныне молим тя, святителю чадолюбиве: / не
остави паствы твоея, / но посети ю
милосердием твоим.

Слава, глас 6:

Глаголет Господь во святем Евангелии: / «Не
убойтесь убивающих тело». / Тако и ты, святе
Вениамине, / на высоту духовную восшед / не
устрашился еси угроз власти безбожных, / но
укрепляем благодатию Духа Пресвятого /
мученическую кончину благодарне приял еси. /
И ныне молися о всех нас, / да пребудем и мы
неколебимы и тверды / в вере Православной во
вся дни живота нашего.

И ныне, догматик 6-го гласа.

Прокимен дня. Паримии
священномученические.

На литии стихира храма и святым, глас 1:

Креста всечестнаго непоборимая сила /
укрепляше вас в подвиге вашем, / святителю
Вениамине, архимандрите Сергие, Иоанне и
Георгие, / избранни бысте яко вернии раби
Христовы, / мученицы четверочисленнии, / во
образ четвероконечнаго Креста Господня, /
освящающаго вселенныя четыре концы.

Блажен град, иже прия тела ваша, / и земля,
иже напоена кровьюми вашими, / мученицы
четверочисленнии, / неповинно убиеннии, /
молитесь ко Творцу всяческих, / да сохранит

град и страну нашу / в мире и благополучии / и
избавит ны от прещения Своего праведного.

Слава, глас тойже:

Егда на смерть шествовал еси, святителю
Вениамине, / тогда тих и спокоен был еси, /
крестным знамением ограждаяся и молитву
творя, / такожде и ты, архимандрите Сергие, /
воздыхал еси о вразех своих: / «Прости им,
Боже, не ведут бо, что творят». / Вы же,
мученицы Иоанне и Георгие, / скорби
временней предаваясь, / в борении
предсмертном пребываху. / Ныне же вси вкупе
Богovi предстоят / и молятся о душах наших.

И ныне, Богородичен, глас тойже: Се исполнися
Исаиино проречение:

На стиховне стихиры, глас 2:

Видя волка грядуща, / иже восхоте власть
церковную похитити, / в бегство малодушное не
обратился еси, / архиерею доблестный, / и
кормила управления народом Божиим, / яже
вручи тебе Господь, а не человек, / в руке
чуждии не предал еси, / и пастырь добрый
показался еси, / полагаяй душу свою за овцы
своя.

Стих. Егда нечестивых от Церкви отлучил еси, /
ревнуя о чистоте Невесты Христовой, / тогда

злобе их предан был еси, / и смерть от рук
безбожных приял еси, / священномучениче
Вениамине, / светлая красото града нашего.

Стих. Угроз и клеветы властей безбожных не
устрашился еси, / и во своих решениях тверд
пребыл еси. / Сего ради и кончину
мученическую улучил еси, / явив христианом
образ злострадания за имя Христово, / иерарше
предивне.

Слава, глас тойже:

Ведому ти на судище беззаконное, / вси вернии
сретаху тя на стогнах града Петрова, / воспевая
ти, страстотерпче новый: / «Спаси, Господи,
люди Твоя», / и колена своя во умилении и
сокрушении сердец прекланяху.

И ныне, предпразднства.

Утреня

**На Бог Господь тропарь Кресту дважды, Слава,
тропарь священномученику Вениамину, и ныне,
тропарь Кресту.**

Седален 1-й:

Посрамил еси, святе Вениамине, лжеучителей
нечестивых, учение Христа помрачивших и
разделение в Церкви произведших. Тщетно тии
склоняху тя власть архиерейскую оставить. Не

устрашился еси онех угроз и прещений, обаче, десницею Божией укрепляем, тверд и непреклонен до конца пребыл еси.

Слава и ныне, Богородичен:

Пресвятая Дево, Отроковице Преблагословенная, блаженна показала еси Христа Бога рождши, блаженны Содевающаго Того воли повинующиися.

Седален 2-й:

Аще и восторжествова на время краткое неправда беззаконных, иже искаша погибели твоей, архипастырю и мучениче достославне, но вскоре память их с шумом погибе. Твое же имя, яко Истины поборника и последователя, сияет на небесех, и слава твоя во веки пребудет неизменна.

Слава и ныне, Богородичен:

Пречистая Богородице, Егоже Спаса Христа неизреченно родила еси, моли со священномучеником Вениамином, во еже просветити и спасти род наш.

По полиелее седален:

Испыташа тя Господь, святителю славне, в горниле испытаний и обрете верным Себе; очисти тя, яко злато, в печи страданий и, яко волну, убели тя; проидоша сквозе огонь и воду и

обрел еси вечный покой, о камению драгий,
положенный во основание здания Церкви
нашей.

Слава и ныне, Богородичен:

Святейши явилася еси херувим, на земли
рождающая Христа, всех Владыку, Чистая
Всенепорочная Владычице.

По 50-м псалме стихира, глас 6:

Небеса возвеселишася во отшествии вашем, /
святителю Вениамине и архимандрите Сергие, /
Иоанне и Георгие, воины честнии Христа Бога
нашего, / мученицы четверочисленнии. / Ныне
в Царствии Небесном неразлучны пребываете, /
молитесь ко Господу / о единении рода
христианского, / о умирении и спасении душ
наших.

Канон Креста на 4 и канон святым на 4, глас 8.

Песнь 1

Кротостию боголюбивыя души твоя покорил
еси паству твою, святителю Вениамине, и ея
первый избранник явился еси среди прочих
архиереев Петербургских.

Во утверждении твоём на кафедре столичней,
святче Вениамине, глас народа глас Божий бысть:
в нём бо познася и открыся о тебе благая воля
Господня.

Не посрамил еси ожидания народа твоего, но во всем верен Истине оказался еси, архиерею Божий, образ совершенного служения Господеви православным людям являя.

Богородичен: Обрет Тя чистшу, Всечистая, всея твари, всех Зиждитель и Бог, воплотитися благоволи, из Тебе плотию человека вообразити промысливый.

Песнь 3

Не токмо православныя, но и иноверныя / притекаху к тебе, архипастырю дивный, / покорил еси тех кротостию и чистотою души твоея. / Сего ради в годину тяжкую / прибегаху к тебе вси яко к пастырю истинному, / взыскуя совета и утешения духовнаго.

Чистотою душевною и молитвою непрестанною к ближнему любовь искреннюю приобрел еси, святителю Вениамине, сего ради прослави тя Господь и приведе тя к веселию вечному.

Приблизися к небесем чистотою, кротостию и любовию, архипастырю Петербургский, и егда прииде година тяжкая и наста времена испытания, исполнися от Бога и мужеством, и крепостию, и дерзновением.

Богородичен: Чистоты Чистое и девства Честное селение, приидите, вернии, воспоим радостными песнопеньми.

Седален.

Не хранят свещу зажженную под спудом, но
износят в храмину и на подсвещнике
поставляют ю, да светит всему миру. Тако
просветися светом дел твоих, отче Вениамине,
Церковь Российская, совершающая днесъ
святую память твою.

Слава и ныне, Богородичен:

К Тебе прибегаем, Богородице всепетая, и Тебе
припадающе молимся, Твоим ходатайством,
Владычице, и молитвами Твоего угодника
святителя Вениамина, милостива нам сотвори,
Егоже пречисто и недоведомо родила еси,
Христа Бога нашего.

Песнь 4

Любовию твоею ко Христу низложил еси вся
козни лукаваго и облекся еси в броню правды,
святителю Христов Вениамине, и неуязвим
пребыл еси посреде всех наветов вражиих.
Не одоле нечестивых собрание, о архиерею
Петербургский, непорочности души твоея, еюже
препобедил еси вся полки супостат, держа в
руках своих Креста победное знамение.
Мудростию свыше от Бога увенчан,
архипастырю дерзновенный, неуклонно стезею
правды Христовой шествовал еси и Церковь
Господню во времена ненастных по пути

евангельскому направлял еси.

Богородичен: Неискусобратно родила еси, о Дево, и по рождестве явилася еси девствующи паки. Тем немолчными гласы, радуйся, Тебе, Владычице, верою несомненною зовем.

Песнь 5

Борением внутренним в темнице томим, чаще голгофской приобщился еси, егда же воле Божией всецело предался еси, абие тишиною и покоем небесным исполнился еси, мучениче добропобедный.

Во узилище суше, фиал страданий, предуготованный тебе, до конца изсушил еси, и велиих утешений и радости неизреченней от Духа Святаго удостоился еси, мучениче преславный.

Казни смертныя за имя Божие ожидая, рекл еси, иерарше досточудный: «Аз ныне радостен и покоен, якоже и всегда», проникнув духом своим в тайну мучеников Христовых.

Богородичен: О Мати Божия! Души моя озлобление исцели, рождающая Всеблагое Слово, вся облагодетельствовавшее.

Песнь 6

«Христос — наша жизнь, и свет, и покой есть, с Ним всегда и везде хорошо быть», — тако и под

стражей сущи, наставляя еси паству твою, отче Вениамине, приуготовляя ю к гонениям, темницам и узам.

Видя Церковь теснимую со всех сторон, святителю Христов, духом не унывал еси, твердо веруя словесем Господним, яко врата адова никогдаже одолеют Ея.

Пастырей своих назидал еси, мудре архиерею, да оставят ум свой, ученость и силу, и все упование возложат на Бога и верою непоколеблемою вооружатся, яко Спаситель наш сохранит Церковь Свою нерушиму до скончания века.

Богородичен: Глаголы Гавриила, Дево Всенепорочная, ныне имуще вопием: Радуйся, Едина Мати благословенная, радуйся, Двере Правды, Солнце имущая.

Икос:

Яви тя Господь, святителю отче Вениамине, /
яко велие украшение града нашего, / яко
дивнаго предстателю о людех твоих, / яко
истиннаго свидетеля правды Божией, / яко
ходатая новаго, / яко наставника заблуждшим,
/ яко любви и кротости правило, / яко
светильника во тьме греховней сияющего, / яко
мученика дерзновеннаго, / яко исповедника
твердаго, / яко столпа непоколебимаго Церкви

нашей, / яви ты Господь яко вернаго служителя
Своего / во спасение душ наших.

Песнь 7

«Не аз, Вениамин немощнейший, спасаю
Церковь, но сам Ею спасаюсь и держуся», —
такো помышляя еси, во смирении пребывая,
священномучениче, сего ради нимало страшился
еси о судьбе Невесты Христовой.

Ревнителю Илии и Моисею Боговидцу
поревновал еси, отче священная явленне, и
ересеначальники посрамил еси.

С юных лет восхищаяся подвигом святых
страстотерпцев, отче Вениамине, чаще их
приобщитися желал еси. И се услыша Господь
тайное воздыхание твое, и исполни боголюбивое
хотение твое, и увенча ты венцем мученика.

Богородичен: Вышшая небесных божественных
сил, Едина от веков Ты еси истинно: Зиждителя
бо сих родила еси несказанно, Богородительнице
Всечистая Владычице.

Песнь 8

Монашествующих славо и похвало, иерарше
досточудне, сохранил еси добре в житии твоём
иночества обеты, посреде мира сияя
нестяжанием, послушанием и целомудрием.

Молитвою и чистотою благодать Духа Святаго

обильно стяжал еси, архипастырю духоносный, и силою Божества исполнился еси, препобеждая ею вся козни лукаваго.

«Наста время подвига, не посраим же веры Православныя и упования нашего, яже есть надежда благ вечных», — сими словесы укреплял еси братию твою, святителю Вениамине, исполняя долг архиерейский даже до кончины мучнической.

Богородичен: Жезл из корене Иессеева, Дево, была еси, цвет возрастивши всесильнаго Господа, нас облагодатствующаго и благодать всем подающаго, вопиющим: благословите вся дела Господня Господа.

Песнь 9

Пред судилище мучителей ты предстал еси, блаженне Вениамине, ризою своею честною союзники своя закрывая, и осуждения несправеднаго тех избавити ища, себе единого виновником церковных беспорядков объявил еси.

Исполнился правда словес апостольских во убиении вашем, мученицы четверочисленнии, яко ни скорбь, ни гонения, ни настоящая, ни грядущая не возмогут верных отлучити от любви Божия, сего ради вас ублажаем.

Духа мира сего, яже есть похоть плоти, похоть

очес и гордость житейская, препобедили есте, мученицы Христовы, помозите убо и нам посреде рода невернаго отражати вся лести вражия, непрестанно ищущия погибели нашея.

Богородичен: Тя неискусомужно рождшую Жизнодавца и Спаса, вси молим прилежно, Богородицу Тя исповедаючи, избавитися всякия скорби Твоими молитвами, Мати Дево.

Светилен.

«В мире скорбни будете, но дерзайте, яко Аз победих мир», — глагола Господь учеником Своим. Сей завет Спасителей добре хранил еси, архиерею праведный, и победу Божию узрев, с нею восшел еси во светлыя чертоги Царства Небеснаго.

Слава и ныне, предпразднства.

На хвалитех стихиры, глас 8:

Клевету от человек беззаконных претерпел еси, / суд неправденый и предательство лжебратий, / священномучениче Вениамине, / и Христу-Архипастырю уподобился еси, / смерть прияв за Истину и други своя, / жребия високаго удостоился еси, / сего ради почтиаем тя и совершаем память твою.

Иуда новый со стражею и воины к тебе пришед, / лицемерно благословение твоего испросил еси,

/ ты же, о архиерею неподкупный и
прямодушный, / не желая имети общения со
слугою тьмы, / целования лживаго не даде ему,
/ и обличая нечестивое намерение его: / «Мы же
не в Гефсиманстей веси» рекл еси ему.

Обновил еси истину Евангелия смертию своею, /
святителю Христов Вениамине, / поднебесную
всю непреложно убедил еси, / яко словеса
вечныя книги старения не имут, / яко не оскуде
до конца благочестие, / яко Церковь Божия
порождает верных чад Христу, / и на подвиг
мученический воздвизает их / во времена
последняя, якоже и в первыя.

Не словес плетением, / ни изысканностию слога,
/ но паче простотою и искренностию /
проповедь воя, иерарше досточудне, / до
глубины сердец чад твоих достигая, / веру
правую в них укрепляла еси. / Сего ради
усердно собирахуся вси людие / во храм
Господень на служение твое.

Слава, глас 6:

Жертва Богу принесостася непорочная, /
мученицы четверочисленнии, / во освящение
душ наших, / темже прославляем Христа Бога
нашего, / давшего нам ходатаев новых, /
укрепляющих ны во исповедании веры
Православныя.

И ныне, Богородичен:
Владычице, приими молитвы раб Твоих

